

Izjava: Čović isplaćivan nelegalno

OHR Sarajevo

U današnjem pismu visokog predstavnika Paddyja Ashdowna predsjedavajućem Predsjedništva BiH Borislavu Paravcu navodi se da je nastavak nelegalnog plaćanja doktora Dragana Čovića, a nakon što je smijenjen sa pozicije člana Predsjedništva BiH 29. marta 2005. godine, direktno i flagrantno suprotstavljanje odluci visokog predstavnika.

OHR posjeduje dokumentaciju iz koje se vidi da je dato odobrenje za nastavak ove isplate. Ovo pitanje je detaljno raspravilo i samo Predsjedništvo BiH koje se suglasilo odobriti isplate doktoru Čoviću.

Iako je Predsjedništvo BiH naložilo prestanak isplata to ne mijenja na činjenici da inicijalno odobrenje čini najozbiljnije kršenje dejtonskih instrukcija.

Visoki predstavnik je u današnjem pismu dao rok Predsjedništvu BiH do 29. juna ove godine da:

1. Osigura da su sve isplate Draganu Čoviću stopirane. Ovo uključuje bilo kakve dodatke ili privilegije koje možebitno i dalje uživa npr. upotreba službenog automobila ili stana.
2. potvrdi kako Dragan Čović više ne koristi bilo koje prostorije Predsjedništva BiH.
3. precizno navede sve privilegije koje je kao član Predsjedništva dr Čović uživao nakon smjene.
4. objasni kako je donešena odluka o nastavku isplata te tko snosi političku odgovornost za donošenje ovakve oluke.

5. Da identificira mehanizam brzog povratka svih nelegalnih isplata.

“Osim što ova odluka predstavlja jasno kršenje Dejtona čini se da je takav potez još jedan primjer neuspjeha Predsjedništva BiH provede pravilnu financijsku kontrolu i zaštititi interese poreskih obveznika, na način kako su to predložili BiH revizori”, rekao je danas visoki predstavnik. “Ove stvari su pitanja za domaće političke vlasti koje trebaju riješiti. Također kao prioritet moraju se ponovo razmotriti financijske procedure unutar Predsjedništva”, dodao je visoki predstavnik.

Član Predsjedništva Jović jučer je ustvrdio da su Mirko Šarović i Sefer Halilović nastavili primati prinadležnosti i nakon što su napustili funkciju. Situacija u oba ova slučaja, kao i u slučaju gospodina Jelavića sasvim je različita od one dr Čovića:

- Mirko Šarović je dao ostavku na mjesto člana Predsjedništva BiH. To je omogućilo daljnje isplate prema zakonu.

- Sefer Halilović je na sličan način dobrovoljno odstupio sa svoje pozicije te je u istoj situaciji kao gospodin Šarović

- Odluka visokog predstavnika o smjeni Ante Jelavića nije sadržavala odredbu koja kaže da privilegije trebaju biti ukinute.